

Jangan mudah tunduk ugutan ekstremis: PM

BH 7 OCT 2002

Oleh Kadir Dikoh dan Tuan Nazri Tuan Ismail

KUALA LUMPUR, Ahad – Datuk Seri Dr Mahathir Mohamad hari ini mengingatkan parti komponen Barisan Nasional (BN) supaya tidak mudah tunduk terhadap sebarang ugutan puak ekstremis.

Perdana Menteri berkata, puak terbabit sentiasa berusaha untuk mengurangkan undi parti kerajaan dan akan sentiasa mengugut jika mendapati parti komponen mudah tunduk kepada ugutan mereka.

“Walaupun komponen BN terdiri daripada parti yang mewakili pelbagai kaum, kita harus mengambil pendekatan yang sederhana. Kita harus rasional dan jangan biarkan diri kita terpengaruh dengan puak ekstrim.

“Kita harus berani menegakkan kebenaran dan membuat keputusan yang akan memanfaatkan semua dan bukannya sesuatu kaum saja,” katanya ketika merasmikan Perhimpunan Agung Parti Progresif Penduduk Malaysia (PPP) ke-

49 di Dewan Merdeka Pusat Dagangan Dunia Putra (PWTC) di sini, hari ini.

Dr Mahathir yang juga Pengerusi BN memberi contoh bagaimana langkah kerajaan menggalakkan percampuran di kalangan golongan muda menerusi sekolah wawasan dipolitikkan segelintir puak ekstremis yang mengambil kesempatan dengan menuhkan kerajaan mahu menghapuskan sekolah jenis kebangsaan.

Beliau mengulangi bahawa sekolah jenis kebangsaan dilindungi Perlembagaan dan pindaan yang dibuat dalam undang-undang menghalang kerajaan menukar sekolah itu kepada sekolah kebangsaan atau menghapuskannya.

Katanya, jika parti dan pemimpin komponen BN lemah serta bersengketa, maka lebih mudah bagi puak ekstremis itu mendapat sokongan.

“Dalam sistem demokrasi, sokongan majoriti menentukan siapa yang akan menjadi kerajaan,” katanya.

Dr Mahathir berkata, walaupun pada umumnya hubungan antara kaum di Ma-

laysia kini amat baik, terdapat perpisahan antara golongan muda di sekolah dan institusi pengajian tinggi yang tidak baik kepada masa depan negara untuk meneruskan kemajuan.

Pada sidang akhbaranya pula, beliau berkata, suasana di sekolah sekarang sudah tidak kondusif bagi membentuk kerjasama baik di antara kaum.

“Kalau kita perhatikan golongan tua termasuk saya sendiri terdiri daripada orang yang dulu semasa di sekolah dan bekerja, bercampur secara bebas antara kaum tetapi tidak didapati sekarang ini.

“Di sekolah kebangsaan, sudah menjadi tidak menarik kerana tidak ada kemudahan bagi mengajar bahasa Cina, Tamil dan bahasa lain... tidak begitu menarik sehingga penuntut Cina sekarang sudah pergi kepada sekolah jenis kebangsaan.

“Penuntut Melayu juga meninggalkan sekolah kebangsaan untuk pergi ke sekolah agama dan mereka tidak berpeluang sama sekali bercampur dengan kaum lain,” katanya.